

A *rubá*

A *ntaño*

PAROKIA DI SAVANETA

Historia di e parokia di Savaneta lo no ta completo, si nos no dedica un Aruba Antaño tanto na esnan cu a duna tur nan energia y dedicacion na nan trabao, tanto den misa, pastorie, como e schoolnan y e alumnonan. Nos tin di corda riba Pancrasia y Nena cu a duna mas di cuarenta aña na e servicio aki. Hopi a bini y a bai pero Pancrasia y Nena a keda pa sirbi tal y tal pastoor, diez en total cu a bini durante e cuarenta aña, pero mas tanto nan a dedica nan bida den sirbishi di Iglesia.



Vena, Carmen, Pancrasia, Bets.

Sea cu nan a traha cu un pastoor cariñoso, sea pa un pastoor di un caracter difícil (cu sa lanta cu mal beis of ta yen di otro caprichonan) semper nan a keda fiel na nan trabao.

Sea cu nan tabata haci trabao di cas, sea den cushina, sea cu nan ta percura pa paña di misa y sacristia, flornan y matanan pa altar, sea cu nan ta cria bestia na cantidad manera cabrito, galiña, paloma y pushi, semper nan a hacié cu zelo y amor.

Ademas Pancrasia for di principio un miembro activo di koor; e misanan y responsnan cu el a canta no ta di conta mas. Tempo cu tabatin congregashi e tabata hopi aña un di e prefectanan, y asina el a contribui na liturgia y bida religiosa den parokia.

Specialmente mester worde menciona su trabao pa cultura y recreacion pa pueblo di Savaneta. Den un tempo cu no tabatin cuenta di Sticusa y Cas di Cultura, den tempo cu Mascaruba no tabata existi ainda, ni CCA, el a guia un grupo di mucha-muheran "Las Violetas".

Nan a hunga comedia, nan a trece anochinan cultural cu canticanan y reidans. Nan a presenta no solamente na Savaneta, pero tambe na otro parti di nos isla. Hopi biaha nan a actua pa haya fondo pa e misa nobo di Savaneta.

Tambe ta di recorda e hubileo di 40 aña di juffrouw Bets como maestra di school, 28 di Augustus 1968 tabatin fiesta pa juffrouw Pascuala cu tabata cumpli 35 aña na school. El a traha tres aña mas te na su morto na 1971. Ken lo midi e bon influencia di e dos juffrouw nan aki?

Nan actividadnan riba tereno di comedia y otro forma di cultura, pero principalmente nan palabra y bon ehempel tabata añanan largo un guia pa e hubentud di Savaneta.

Cada parokia y cada barrio di Aruba tin su tiki Aruba Antaño cual segun espacio permiti nos lo trece nan adilanti.